


Ni Presidente Thomas S. Monson



Panangpadaras iti Aramid

Ammoyo kadi a 98 a tawen ti naisubli a Simbaan idin sakbay a naaddaan daytoy iti 100 nga stake? Ngem kalpasan ti nakurang a 30 a tawen, binukel ti Simbaan ti maikadua a 100 nga stakena. Ken walo a tawen laeng kalpasan dayta addaanen ti Simbaan iti nasurok a 300 nga stake. Ita addaanen ti simbaan iti nasurok a 3,000 nga stake.

Apay a maar-aramid ti kasta a kapardas daytoy a panagdakkel? Gapu kadi ta nalatlaktayon? Gapu kadi ta addaantayo kadagiti napipintas a chapel?

Napateg dagitoy a banag, ngem ti gapu ti panagdakkel ti Simbaan ita ket impakitan ti Apo daytoy a mapasamak. Iti Doktrina ken Katulagan, kinunana, “Adtoy, padarasek ti aramidko iti panawenna.”¹

Datayo, kas espiritu nga annak ti Nailangitan nga Amatayo, ket naibaon iti daga iti daytoy a panawen tapno makiraman iti panangpadaras iti daytoy naindaklan nga aramid.

Iti pannakaammok, saan iti kaano man impakita ti Apo nga iti laeng mortalidad ti aramidna. Ketdi, sakupen ti aramidna ti kinaagnanayon. Mamatiak nga padardarasenna ti aramidna iti lubong dagiti espiritu. Mamatiak pay a ti Apo, babaen dagiti katulonganna, ket mangisagsagana iti adu nga espiritu nga umawat iti ebanghelio. Trabahotayo ti mangsukisok kadagiti minataytayo ket mapantayo iti templo ket aramidentayo dagiti sagrao nga ordinansa a mangyegto kadagita a pimmusayen kadagiti isu met laeng a gundaway nga adda kadatayo.

Adu ti aramiden ti tunggal nasingpet a Santo iti Uduina nga Aldaw iti lubong dagiti espiritu, kinuna ni Presidente Brigham Young (1801–77). “Ania ti ar-aramidenda sadiay? Agikaskasabada, agikaskasabada iti amin nga oras, ket isagsaganada ti dalan para kadatayo tapno mangpadaras iti aramidtayo iti panangbangon kadagiti templo ditoy ken iti sadino man.”²

Ita, saan a nalaka ti aramid a family history. Para kadakayo manipud iti Scandinavia, maipadakayo kaniak iti pannakapaayyo. Kas pagarigan, iti liniak a Swedish, Nels Monson ti nagan ti lelongko; saan ketdi a Monson ti nagan ti amana no di ketdi Mons Okeson. Oke Pederson ti nagan ti ama ni Mons, ken Peter Monson ti nagan ti amana—naisubli manen iti nagan a Monson.

Namnamaennatayo ti Apo mangsukisok a sipapasnek iti pakasaritaan ti pamiliatayo. Panagkunak ti umuna a banag a masapul nga aramidentayo no nasken a suksokentayo a nasayaat ti pakasaritaan ti pamiliatayo ket maaddaantayo iti Espiritu ti Nailangitan nga Ama. No agbibigtayo a nalinteg kas iti pannakaammotayo a nasken a panagbiagtayo, luktannanto ti dalan para iti pannakatungpal dagiti bendision a sipapasnek ken situtudio a sapsapulentayo.

Agbidduttayonto, ngem awan kadatayo iti agbalin nga eksperto iti aramid a family history no saantayo nga umuna nga agbalin nga agdadamo. Ngarud, nasken a sipapasnek nga aramidentayo daytoy a trabaho, ken nasken nga agsaganatayo a mangpasar kadagiti rigat iti panangaramidantayo iti daytoy. Saan a nalaka daytoy nga aramid, ngem

impaaramid ti Apo kadakayo daytoy, ket impaaramidna kaniak daytoy.

No trabahuenyo ti aramid a family history, mapasaran-yonto dagiti rigat a manglapped kadakayo nga agprogreso iti panagaramidyo iti family history, ket kunaenyonto iti bagiyo, “Awanen ti maaramidko pay.” No dumtengto kadakayo dayta a gundaway, agparintumengkayo nga agkararag ket kiddawenyo iti Apo a mangted iti solusyon a makatulong kadakayo, ket itdennanto ti tulong kadakayo. Paneknekak a pudno daytoy.

Ay-ayaten unay ti Nailangitan nga Ama dagiti annakna iti lubong dagiti espiritu kas iti panagayatna kadatayo. Maipanggep iti aramid a pangisalakan iti minataytayo, kinuna ni Propeta Joseph Smith, “Ket ita bayat ti panangpadaras kadagiti naindaklan a panggep ti Dios iti panna-kaipatungpalda, ken pannakaipatungpal dagiti banag nga insao dagiti Propeta, bayat ti pannakaipasdek ti pagarian ti Dios iti rabaw ti daga, ken pannakaisubli ti nagkauna nga urnos dagiti banag, imparangarang ti Apo kadatayo daytoy a pagrebbengan ken pribilehio.”³

Maipanggep kadagiti kapuonantayo a pimmusayen nga awanan pannakaammoda iti ebanghelio, impakdaar ni Presidente Joseph F. Smith (1838–1918), “Babaen dagiti panagkagumaantayo a maipaay kadakuada, mawaya-wayandanto iti naespirituan a pannakaadipen wenno pannakabalud, ken aglawagto ti sipngget a nanglawlaw kadakuada, agraniagto ti silaw kadakuada ket mangngegandanto iti lubong dagiti espiritu ti aramid nga inleppasen para kadakuada dagiti annakda ditoy daga, ket makipagrag-odanto kadakayo iti panangipatungpalyo kadagitoy a pagrebbengan.”⁴

Minilmilion nga espiritu nga annak ti Nailangitan nga Amatayo ti saan pay a nakanggeg iti nagan ni Cristo sakbay ti ipapatayda ken ipapanda iti lubong dagiti espiritu. Ngem itan nasuruandan iti ebanghelio ket ur-urayenda ti aldaw a panangaramidtayonto iti panagsukisok a kasapulanan tapno malawagan ti dalan tapno makapantayo iti balay ti Apo ket aramidentayo para kadakuada ti aramid a saanda mismo a kabaelan nga aramiden.

Kakabsatko a babbai ken lallaki, paneknekak a bendisionanntayto ti Apo no awaten ken sungbatantayo daytoy a karit.

PANANGISURO MANIPUD ITI DAYTOY A MENSAHE

Mangpanunotka iti paggugustom nga estoria manipud iti pakasaritaan ti pamilyam ket ibinglaymo daytoy kadagiti sarungkaram. Mabalin a kayatmo nga usaren dagitoy a saludsod iti beneg dagiti ubbing iti Mensahe ti Umuna a Panguluken (panid 6) a pangallukoy kadagiti sarsarungkaram a mangibinglay kadagiti estoria manipud iti pakasaritaan ti pamilyada. Ibilangmo a basaen ti Doktrina ken Katulagan 128:15 ken ilawlawag ti kinapateg ti panagaramid kadagiti ordinansa iti templo a maipaay kadagiti kapuonantayo.

DAGITI NAGADAWAN

1. Doktrina ken Katulagan 88:73.
2. *Teachings of the Presidents of the Church: Brigham Young* (1997), 280.
3. *Teachings of Presidents of the Church: Joseph Smith* (2007), 409.
4. Kitaen iti *Teachings of Presidents of the Church: Joseph F. Smith* (1998), 247.

AGTUTUBO

Magustuak Ngata ti Indeksing?

Ni Emma Abril Toledo Cisneros

Nakiramanak iti panggepmi a tun-oyen iti stake nga agindeks iti 50,00 a nagnagan. Idi damo narigat daytoy. Iti sumagmamano a gundaway ti batch a nadoownloadko ket narigat a basaen ti surat nga insurat ti ima, ket no dadduma kayatko nga isubli daytoy ken agdownloadak iti sabali. Ngem naamirisko a no kastoy met ti panunoten ti tunggal maysa, mabati a di naileppas dagita a batch iti udina. Mapampanunotko nga adu a nakalinia a tattao ti agur-uray iti lubong dagiti espiritu, ket inkeddengko nga ituloy a mangikarigatan a mangbasa kadagidiay a nagnagan ket ulitek nga isurat dagitoy nga awan biddut.

Nasursurok nga impateg dagidiay a pimmusayen a tattao. Naawatak a pudno a kasapulanda ti tulong, ket kasapulantayo met ti tulongda. Ad-adda a naawatak a ti naan-anay a plano ti Nailangitan nga Ama ket ti pannakaseknanna iti tunggal maysa. No surotentayo ti pammaregta ken dagiti pangiturong dagiti napili a daaulona, masaksiantayonto ti asi ken awan patinggana nga ayatna.

Napintas a padas para kaniak ti indeksing. Nasurok nga ikkan pateg ken ayaten ti adu a banag maipapan iti pakasaritaan ti pamilia wenno family history. Nakagun-odak pay kadagiti sagut a naindaklan ti pategna manipud ti Apo babaen ti panagtungpal iti maysa a banag a gagangay kas iti pannakiraman iti indeksing.

Agnanaed ti nagsurat iti Veracruz, Mexico.

ANNAK

Ammuenyo Dagiti Estoriayo

Aduan dagiti nagannak kadakayo ken appoyo iti adu a padpadas—sumagmamano a pannakigasanggasat a saanyo pay a naam-ammuan! Sumagmamano kadagiti estoriada ti mangpakatawanto kadakayo, ken makatulongda a maaddaankayo iti

pammati iti Nailangitan nga Ama. Ngem uray pay dagiti nataengan ket managbabain no dadduma. Usarenyo dagitoy a saludsod a makatulong kadakuada a manglagip iti sumagmamano a paggugustoda nga estoria ket isuratyo dagitoy wenno idrowingyo dagiti ladawan dagiti sungbatda.

1. Isaritam kaniak ti maipapan iti tallo a kararagsakan a lagipmo.
2. Ania daydi kanito a nakapabainam unay?
3. Isaritam kaniak maipapan ti aldaw a nayanakak.
4. Ania ti kayatmo nga aramiden idi ubingka pay?
5. Kasano ti pannakagun-odmo iti pammaneknekmo maipapan iti ebanghelio?

© 2014 ti Intellectual Reserve, Inc. Nailatang amin a karbengan. Naimal-dit iti EUA. Pannakaanamongna iti Ingles: 6/14. Pannakaanamongna a maipatarus: 6/14. Pannakaipatarus ti *First Presidency Message, June 2014*. Ilokano. 10866 864



Pammati • Pamilia • Tulong

Ti Nadiosan a Mision ni Jesucristo: Agserserbi

Nainkararagan nga adalenyo daytoy a material ket kalikagumanyo nga ammuen no ania ti ibinglayyo. Kasano a ti pannakaawat iti biag ken mision ti Mangisalakan ket mangpapiagsa iti pammatiyo Kenkuana ken mangbendision kadagiti ay-aywananyo babaen ti visiting teaching? Para iti ad-adu pay nga impormasion, mapan iti relief socie

Daytoy ti paset ti maysa a serye dagiti Mensahe iti Visiting Teaching a mangitampok kadagiti aspekto ti mision ti Mangisalakan.

Bayat ti panagserbitayo kadagiti dadduma, agbalintayo a pudno a pasurot ni Jesucristo, a nangipakita iti pagwadan para kadatayo. Ni Presidente Thomas S. Monson kinunana: “Napalawlawantayo kadagiti agkasapulan. . . . Datayo dagiti ima ti Apo ditoy daga, nga addaan iti bilin nga agserbi ken mangitag-ay kadagiti annakna.”¹

Ni Linda K. Burton, Relief Society general president, insurona: “Babaen iti panangaramid, agbalin ti tunggal maysa kadatayo nga adadda pay a kas iti Mangisalakan no pagserbiantayo dagiti annak ti Dios. Tapno makatulong a nasaysayaat kadatayo nga [agserserbi iti] tunggal maysa, kayatko nga isingasing ti uppat a balikas a laglagipen: ‘Umuna agpaliw, kalpasanna agserbi.’ . . . No aramidentayo, agtungtungpaltayo kadagiti katulagan, ket ti panagserbitayo kas iti panagserbi ni Presidente Monson, ket pakakitanto ti kinadisipulotayo.”²

Makapagkararagtayo iti tunggal agsapa tapno mailasintayo dagiti gundaway a pakapagserbiantayo kadagiti dadduma pay. “Tarabayenakanto ti Nailangitan nga Ama, ket tulongannakanto dagiti anghel,” kinuna ni David L. Beck, Young Men

general president. “Maikkankanto iti bileg a mangbendision iti biag ken mangisalakan kadagiti kararua.”³

Manipud kadagiti Nasantuan a Kasuratan

Mateo 20:25–28; 1 Nephi 11:27–28; 3 Nephi 28:18

Manipud iti Pakasaritaantayo

Iti sapasap a komperensia idi Oktubre 1856, inwaragawag ni President Brigham Young (1801–77) nga agdaldaliasat pay laeng idi dagidi nagkauna a kameng nga aggyuyuyod iti karison iti Estados Unidos nga agturong iti Utah, ket nasken a tumulong ti amin iti panangumong a dagus kadagiti abasto para kadakuada. Insurat ni Lucy Meserve Smith a dagiti babbai “inikkatda dagiti petticoatda [dakkel nga akinuneg iti palda], medias, ken tunggal banag a maispalda, idiy mismo a lugar iti Tabernakulo, ket pinagtutunda [dagitoy] kadagiti bagon.”

Bayat ti panagrugi nga isasangpet dagiti naispal a nangkauna a kameng ti Simbaan iti Salt Lake City, insurat ni Lucy, “Diak kaano man naaddaan iti nalalaus pay a . . . ragsak iti ania man nga aramid a trinabahok iti biagko, gapu ta adda kasta a rikna ti panagkaykaysa kadagiti tao. Nasken laeng a mapanak iti maysa a pagtagilakuan tapno

ipakaammok dagiti kayatko; no kawes daytoy a kasapulak, marukod, magetteng, ken maited kaniak nga awan bayadna.”⁴

Ni Presidente George Albert Smith (1870–1951) kinunana maipapan ti panagserbi kadagiti dadduma: “Ti agnanayon a ragsaktayo ket kapasetto ti wagas a panangidatontayo iti bagbagitayo iti panangtulong kadagiti dadduma.”⁵

Ibilang Daytoy

1. Kasano a mangidalan ti kararag kadatayo tapno agbalintayo a ramit kadagiti ima ti Apo?
2. Kasano a makatulong kadatayo ti panagserbitayo kadagiti dadduma nga agtungpal kadagiti katulagantayo?

DAGITI NAGADAWAN

1. Thomas S. Monson, “Ania ti Naaramidko para iti Maysa a Tao Ita?” *Liahona*, Nob. 2009, 86.
2. Linda K. Burton, “First Observe, Then Serve,” *Liahona*, Nob. 2012, 78, 80.
3. David L. Beck, “Your Sacred Duty to Minister,” *Liahona*, Mayo 2013, 56.
4. Joseph Fielding Smith, iti *Daughters in My Kingdom: The History and Work of Relief Society* (2011), 36–37.
5. George Albert Smith, iti *Daughters in My Kingdom*, 77.

© 2014 ti Intellectual Reserve, Inc. Nailatang amin a karbengan. Naimaldit iti EUA. Pannakaanamongna iti Ingles: 6/14. Pannakaanamongna a maipatarus: 6:14. Pannaakaipatarus ti *Visiting Teaching Message*, June 2014. Ilokano. 10866 864